

Marco, qual disse non ha inteso navilio armado in golfo di Salonichij, dove l' ha cargado, fino qui sia fuora si non velle turchesche armade sora Schiati Scopuli, a di 15 marzo. *Item*, è ritornà la galia Cornera, mandò in Candia a soraveder, dice aver visto una vella latina larga in mar e crede sia gripo di Candia. *Item*, le galie di Alexandria zonseno a di 17 marzo al Zante, et a di primo april partino per Alexandria, e a quel tempo li in Candia erano armade di galie la Griega e la Zena.

Da poi disnar fo pregadi et vene le infrascripte lettere.

*De Ingaltera, di sier Andrea Badoer, orator nostro, di 15 april.* Erano in zifra et nulla da conto, fu mandata a trar.

*Dil Camariam a la Signoria nostra.* Una lettera ben ditata di le operatiom l' ha fato a beneficio di questo stato *etc.* et non fo lecta.

*Di Campo, di proveditori zenerali Capello et Gritti, di 23, hore 14, date a le Brentelle.* Come starano li col Campo, si doleno aver lassa' Vicenza, et stanno il Campo li con sicurtà. Di Zitolo lo manderano a Treviso per esser inimicho dil capitano di le fantarie, mandano Hieronimo Pinchin a Citadella, hanno scritto a Bassam stagi costante, e quel proveditor non si parti che non li mancherano.

*Item*, non li par bon la guarda dil Zitolo a Padoa. *Item*, dimandano danari, et manca a pagar li cavali lizieri di domino Jannes et stratioti et 400 fanti nuovi tolti, et hanno auto li ducati 400, in tutto ducati 10 milia, et sono spazati.

*Di Padoa, di rectori, di 23.* Di tre zentilhomeni zonti, zoè Anzolo Querini di sier Zanoto e sier Piero Donado di sier Bernardo, li hanno posti in Coalonga, et sier Beneto Marin a Ponte corbo.

*De li dicti, ozi a hore 14.* Come hanno di Moncelese esser corsi 200 cavali lizieri de li a dimandar la terra sier Marco Marzello, proveditor: li ha risposto, vol tenirla per la Signoria nostra e li scrive se li mandi danari per quelli fanti che exlamano.

*Di domino Jannes di Campo Fregoso a Piero di Bibiena, date in Campo a le Brentelle, a di 22.* Fo leta un' altra, qual si lamenta assai, vol danari per la compagnia, *etc.*

*Di Beneto Ambruosani, proveditor di Conselve, date a di 23 a l' Anguilara.* Come è restà sollo li, li contadini è impauriti e lo abandonò, per la fuga de inimici, hora inteso il campo inimicho va in là, sonò tornati a casa. *Item*, ruinò Bovolenta dove *etiam* era uno proto di la Signoria nostra, et con

fatica assai, quelli muri dil castello erano grossi *etc.* *Item*, si piace a la Signoria nostra, vol andar sul Polesene a tuor Ruigo. Scritoli di no.

*Dil Zante, di sier Antonio da Mulla, proveditor, di 8 april.* Nulla da conto.

*Di Corphù, di rectori, di 25 april.* *Etiam* nulla da conto.

*Di Padoa, di rectori, di ozi, hore 13.* Mandano una depositiom de inimici, et si provedi di mandarli artelarie, polvere e danari et sarano con Lantio da Bergamo per veder quelle artelarie bisogna. *Item*, non hanno sachi et se ne mandino.

Fu publicato per Gasparo di la Vedoia, di hordine dil serenissimo principe et illustrissima Signoria, che tutti, in tanto bisogno, vadino a pagar le sue tanxe, et decime e quelli à a pagar le sue tanxe et decime e quelli à promesso prestar porti li danari a li camerlengi, et non facendo saranno publicati il primo pregadi. Et fo leto quanto si resta a scuoder di le tanxe et decime dil monte novissimo senza li governadori, ducati 110 milia.

Et fo mandato zoso sier Lorenzo di Prioli, proveditor sora i danari in Campo et sier Bernardo Barbarigo, governador di l' intrade, et mandono questa sera ducati 3000.

Fu posto, per i savij di terra ferma, dar a uno Antonio dal Legname da Treviso fidelissimo di la Signoria e si portò ben, *etc.* ducati 10 al mexe di provision fino li sarà dato una possessiom li daga ducati 120 de intrada, qual a Treviso si portò ben *etc.* Sier Luca Trum, è dil Consejo di X, contradise, e fo leto il processo fato per l'horo savij con le deposition; li rispose sier Zuam Corner, savio a terra ferma, et poi li savij dil Consejo introno in questa opinion. Andò la parte, 4 di non sincere 33 di no, 133 di la parte, e fu presa.

Fu posto, per sier Marco Bolani, sier Andrea Venier procurator, sier Thomà Mozenigo procurator, sier Lunardo Mozenigo et sier Zorzi Emo, savij dil Consejo, sier Sabastian Zustignan el cavalier, sier Nicolò Bernardo e sier Alvise Pixani, savij da terra ferma, di elezer domino Luzio Malvezo per governador zeneral dil nostro Campo con 150 homeni d' arme et habbi ducati 20 milia a l' anno per il piatto e ogni cossa, e sia scritto in Campo tutti lo ubedisca. Andò primo in renga e contradise sier Piero Capello, savio dil Consejo, qual messe indusiar fino veniva lettera di Roma, li rispose sier Zorzi Emo. Andò le parte, 7 non sincere, 6 di no, 45 dil Bolani e altri nominati, 115 dil Capello de la indusia e questa fu presa. Et nota sier Antonio Grimani, sier Alvise da